

Extra 20/11/2012

Dekano di abogado Karel Frielink:

PROSESO HURIDIKO SIVIL MESTER POR MIHO

WILLEMSTAD.- Durante su diskurso na okashon di 35 aña eksistensia di Órden di Abogado, Dekano mr Karel Frielink a elaborá riba e di 7 añanan Kódigo Sivil nobo i e prosedura hurídiko. Na opinion di Frielink e proseso hurídiko sivil mester por mihó i den e kaso aki hopi mas mihó.

Frielink a splika ku no mester pensa solamente den ki forma ta mihó pa apliká lei, pero na mes momentu ta bon pa pensa ku si huesnan i abogadonan ta funshoná optimal.

Por pensa tambe kon por adaptá e sistema pa un mihó funshonamentu di manera ku por kontribuí na un

mihó forma di ehekushon di derecho.

Na opinion di Frielink, tin e tendensia ku partidonan ta pèrdè for di bista ku e proseso hudisial sivil, ta e último meta pa haña desishon di un diskrepansia.

Netamente esnan ku ta buskando nan derecho via di proseso hudisial sivil, ta reklamá ku e prosedura sivil ta dura demasiado largu. Esaki ta trese kuné ku un dado momentu no tin bista mas riba e kaso i e proseso ta kosta hopi plaka, miéntras ku durante henter e proseso largu aki, e resultado ta masha difísil pa antisipá.

E tipo di kehonan ku kasi

tur abogado mester a yega di topa den nan karera, mester keda tumá na serio, Frielink ta opiná.

Kon bunita e Kódigo Sivil ta, tin aspektonan den esaki ku sin mas ta mester di mehoransa.

Un di e aspektonan ku Frielink a elaborá riba dje, ta e aspekto di yega na e bèrdat.

Finalmente Frielink a trese dilanti ku apesar ku e no ta partidario di un sistema merikano esta pa un "pre-trial", pero tòg e dekanu ta di opinion ku ta na su lugá pa kuminsá pensa riba un mihó forma pa e prosedura tuma lugá i pa yega na e bèrdat.